

**REGIONAL NEWS BULLETIN**

**HEADLINES (EVENING)**

1. Assamese kumthar, Rongali Bihu chu vawiin khan Aizawl Vanapa Hall ah Chief Minister Pu Lalduhoma hovin hman a ni.
2. Mizoram puma vawiina National Lok-Adalat huaihawt ah thubuai 298 chinfel a ni.
3. Vawiin khan Lok Sabha inthlan thawh lina leh atana camdpaighun hun a tawp a, Thawhtanniah vote thlak a ni ang.
4. Afghanistan-a tuilian avangin mi 200 chaung an thi tawh.

<><><>

**CM**

Assamese kumthar, Rongali Bihu chu vawiin khan Assam Cultural Society Mizoram bultumin Aizawl Vanapa Hall ah vawiin khan hman a ni a. Chief Minister Pu Lalduhoman he hun hi a hmanpui.

Thusawiin Chief Minister chuan, hnam tinin tobul an nei theuh va, hnam nun ze mawi leh tihdan phung tha tak tak an nei thin a. Chung pi leh pute atanga tihdan tha leh hnam nun ze mawi tak tak te chhawm nun zel chu a mawi em em a, thangtharte mawhphurhna pawimawh a ni, a ti.

Mizoram chu British awpna hnuaiyah Assam huam chhungah hun rei tak a bet a, chumi hnuah district council te neiin state hrang a nei chho ta zel a. Ram inthenawm an nih angin kawng tinrengah an inmamawh tawn a, an tanho a ngai a, inrem taka hmasawmna rahbi rah chhoh tlan zel a tul hle a ti a. Kumin kumtir lama Assam Chief Minister Pu Himanta Biswa Sharma nena an inkawmnaah pawh ramria boruak ralmuang awmtir leh harsatna siam lo zawng zela awm an remti dun a ni a ti.

(BYTE)

Chief Minister chuan Chhan hrang hrang avangin Assamese engemawzat Mizoramah an awm mek tih sawiin, thlamuang tak leh hlim taka an awm a beisei a, inunauna leh inhriatpawh tawmna tha siam zel ni se a ti a ni.

Rongali Bihu lawmna hi Assam Cultural Society, Mizoram President Dr. PC Kalita chuan a kaihruai a ni, Mizoramah hian Assamese 500 vel an cheng mek anga chhinchhiah a nih thu a sawi.

Rongali Bihu ah hian Bihu lam leh zai te, Assamese hnam ze pholang thei thil te entir a nih bakah Nepali lam te, Cheraw te entir a ni.

(Corr)

<><><>

## **POL**

Rel kawng chhiat avanga Mizorama petrol leh diesel lakluh a khaih lak hnuah rel kawng hi siamthat a ni tawh a, reilo teah tuialhthei lakluh pawh a inpha man chho tura beisei a ni.

Vawiina sorkar thuchhuah tarlan danin, tun dinhmunah Mizoram aiin Tripura-in harsatna an tawh nasat zawk avangin rel-in tuialhthei a phurh hmasak pahnih chu Tripura tan zuah phawt a ni ang a, a pathumna chu Mizoram tan IOCL hotuten ruahmanna an siam a ni. Hetianga rel kawng a lo that takah chuan petrol leh diesel hi dan pangngai angin tluang takin chat lak lovin lak luh chhonzawm theih a ni tawh ang.

Mizoramin harsatna a tawh mekah mipuite lo chia lo turin Food, Civil Supplies & Consumer Affairs Department chuan ngenna a siam a, harsatna hun remchanga la a, petrol pump thenkhatten a hlawma black-a zawrh tur lo pe chhuak thin an awm tih hriat a ni tih sorkar thuchhuah chuan sawiin hemi vil tur hian District hrang hranga FCS&CA Department, Deputy Commisisoner office leh SP office tangkawpten hma an la a, petrol pump-te CCTV footage thlengin en thin tur a ni a ti.

Heti hlan hian Petroleum Entrepreneurs' and Transport' Union of Mizoram (PETUM) chuan thuchhuah siamin Food, Civil Supplies & Consumer Affairs Department in thuchhuah a siam an chhangle a, thu hriatna rintlak leh chhui chianna awm hmasa loin petrol pump neitute vaukhanna niawm tak thuchhuah an siam a, an trade licence cancel sak hial tura hma lak a tum a, hei hi hriatthiam har an ti tih an thuchhuah-ah an tarlang a ni.

PETUM chuan tuialhthei lakluhna kawngah harsatna awm mahse a theih ang anga Petrol Pump neitute leh a phurtute'n mipui mamawh puhru tura an thawh ve mek lai a, thuchhuah dengkhawng tak a awm ta mai chu mak an tih thu leh Food, Civil Supplies & Consumer Affairs Department thuchhuah anga sorkar thuchhuak kalha Petrol/Diesel hralh an awm a nih chuan dan hmanga hma lak mai tur ni awm tak a nih lai a Petrol Pump neitute laka mipui rilru dik lo puttir thei tur ang zawng a thuchhuah siam a ni chu a pawl takzet a ni an ti a, tun hnuah chuan chhui chiana nei hmasa lo a thu dengkhawng tak inchhuah khumna thleng tawh lo se an tih thu an tarlang.

An thuchhuah chuan Mizoram in Petrol leh Diesel lakluhna kawngah tun hma atangin harsatna a lo tawh fo tawh thin tih sawiin, Mizoram in Oil Depot a neih ve loh avangin harsatna a tawh hma thin a, Mizoram in Oil Depot a neih ve ngei theih nan a sorkar hmalakna pawh beiseina sang tak nena an thlir mek tih an sawi bawh a ni.

(DIPR)

<><><>

## **LOK ADALAT**

Ramchhung hmun dangte rualin vawin khan Mizoramah National Lok-Adalat huaihawt a ni a. Samkhai zawk leh sum sen ngai lova thubuai chinfelna Lok-Adalat hi State Legal Services Authority kaihhruainain Mizoram-a district 8-ah leh Gauhati High Court, Aizawl Bench-ah te huaihawt a ni.

Thubuai ngaihtuah tur case 904 a lut a, chungte chu mimal pawisa inpuktir, rul leh thei lo thubuai te, Bank Loan rul tha thei lo thubuai te leh civil case hrang hrang te an ni.

Vawin National Lok- Adalat-ah hian Mizoram pumah a vaiin thubuai 298 chinfel a ni a. Pawisa kaihhruawih thubuai chinfel hi cheng vbc 5 nuai 11 sing 5 & 226 a tling a ni.

Lok-Adalat in a rel theih thubuaite hi Criminal Compoundable Case te bakah Civil Case chi hrang hrang an ni a, hetiang rorelna hi Lung In intantir zawnga kalpui a nih ve loh avangin thubuai neitute tan an thlang zawk thin a ni.

(Corr)

<><><>

## **NURSES DAY**

Trained Nurses Association of India, Lawngtlai District Branch chuan International Nurses Day vawiin khan Lawngtlai ANM School Conference Hall ah hmangin, Lai Autonomous District Council a Chairman, Pu V.L.Hmuaka'n a hmanpui.

Pu V.L.Hmuaka chuan Nurse hna chu theihna zawng zawng nena inpumpeka thawngai a ni a, a hautakin a hahthlaka, mawhphurhna sangtak an chung a inngat a nih bawkwangin miinthlahdahte tan Nurse hna chu thawh ve ngawt chi a nilo a ti a, damlo te taksa damna piahlahmah an thlarau damna tura Missionary hna thawhpahna remchang tak Nurse hna ah chuan a bettel a, taksa leh thlarau damna, an damlo enkawltan an neih theih nan theihtawp chhuahturin a fuih.

Kumin International Nurses Day thupui atan Our Nurse, Our Future, the Economic Power of Care tih hman a ni a, ANM School, Lawngtlai Principal Pi F.Lalnunsiami'n thuchah tawi sawiin Nurse te chuan an hnathawhah an mahni himna tur leh hmasawna tur an ngaihpaiwmawh a ngaih thu a sawi a, Zirna ah Medical Line chu a harsa ber a, General line a zirtha peihlo te tlankhawmna tur a nihloh thu sawiin, tihtak takna nena tuichilha rawngbawlina a ngaia luhchilh chi a ni a ti.

Lawngtlai a International Nurses Day hmanna hi Pi C.Lalnunziri W/S District Hospital, Lawngtlai chuan kaihruiin, Lawngtlai a Damdawiin pathum District Hospital, lawngtlai, Lairam Christian Medical Centre leh Christian Hospital Lawngtlai a Nurse thawklai leh Pension tawh te, ANM School Lawngtlai a Zirlaite leh sawmbik an tel a, chawhnu lam ah Trained Nurses Association of India, Lawngtlai District Branch hruaitu thar thlanna neih a ni.

International Nurses Day hi a huntak chu naktuk Pathianni hi a ni a, remchan zawkna vangin Lawngtlai ah chuan vawiin khan Day pual hian hun hman a ni.

(Lalnggheta Ralte Lawngtlai PTC)

<><><>

## **THENZAWL**

Tun thla ni 4 a an In atanga chhuak haw leh ta lo Tv Lalrinhlua Thenzawl Hermon veng Thenzawl chu khawtlang leh khaw thenawm mitlawmngai ten ngawrh taka ni 7 an zawn hnuah vawiin chhun khan Chhiarchhuak luiah dam taka hmuh a ni.

Rinhlua hi a bo tuk Pathianni tlai khan Lau phai Sailam ram thlamah hmuh niin a hmutu te hian mi bo a ni tih an hre lo a, Chaw an eitira, a kal leh na lam lo enzui na chang an hriat loh a vangin a chin hriat zui a ni ta lo va, ngawrh taka zawn zui ni mah se chin hriat tur a awm mai thei lova, Vawiin chhun khan Chhiarchhuak lui hnar, Chhiarchhuak lui fintu Darthlalang lui a Aiawt chiah en tura kal, Pu Chaldinglana, Pu R Pachhunga leh Pu Rohmingthanga te thian ho Chhiarchhuak lui dung zawh chho chuan Lui kama Lungpui nghenga a lo thu chu hmuin, Aiawt pawh en ta lo chuan Thlam lamah an paw chho a, chaw te eitirin, Scooty in In lam chanchin hrilh turin pakhat a tlan haw nghal a. An mahni lam turin Motora hmanga tlan thla nghalin dam taka In thlenpui a ni.

Rinhlua hian a kal dan a sawi mai theih loh a vangin, Sailam Leilet thlama chaw a ei hnu hian Lau dung 20 km vel zeta thui zawh thlain Lau lui fintu Chhiarchhuak Lui dung a rawn zawh chho leh a nih rin a ni a, a hriselna dinhmun pawh Thenzawl Damdawi inah check niin, thisen chaw an khai hnuah that lohna a neih hran loh avangin an inah an hruai haw lehngal a ni.

(C.Lalminghlua Serchhip PTC)

<><><>

#### 4<sup>TH</sup> PHASE CAMPAIGN ENDS TODAY

Vawiin khan Lok Sabha inthlan thawh lina leh atana camdpaigh hun a tawp a, vawiin vek khan Andhra Pradesh Assembly inthlan thawhkhata neih tur leh Odisha Assembly inthlan thawh khatna atana campaign pawh a tawp ve bawh. Naktip Thawhtannah vote thlak a ni ang.

Inthlan thawhli naah hian state pakua leh Union Territory pakhata Lok Sabha seat 96 ah inthlan a ni dawn a.

Andhra Pradesh ah seat 25, Telangana ah 17, Uttar Pradesh ah 13, Maharastra ah 11, Madhya Pradesh leh West Bengalah 8 ve ve, Bihar ah panga, Jharkhand leh Odisha ah pali leh Jammu and Kashmir ah 1 ah te inthlan buatsaih a ni ang.

Hei bakah hian Assembly seat 175 awmna Andhra Pradesh leh Odisha Assembly bial 147 zinga 28 ah te vote thlak a ni bawh ang.

(Newsonair)

<><><>

#### ARVIND KHEJRIWAL MEETS PRESS

AAP leader leh Delhi Chief Minister Arvind Khejriwal-a chu ram pakhat hruaitu pakhat One Nation One Leader rinna thehdarhah a puh. Pu Khejriwala chuan BJP ten Aam Aadmi Party nuai chimih vek an duh a ti a. AAP chu party chauh niloin rindan tha nghet tak a ni a ti bawh.

Vawiina New Delhi-a chanchinbumite a kawmnaah Pu Khejriwala chuan I.N.D.I.A block te chuan sawrkar laipuih sawrkar thar an siam ngei a ring tih sawiin AAP pawh he sawrkarah hian a tel ve dawn a ti a. BJP na taka sawiselin hlemhletna leh eiruknaa inhnawih hruaitute an zingah an telh a ni a ti a. BJP te chuan opposition leader te jail-a khung vek an duh ani a ti bawh.

(Newsonair)

<><><>

#### SINGAPORE PM

Singapore Prime Minister Lee Hsien Loong chuan an ram hmasawna tura rampawn atanga mithiamte thawhrah chu lawmawm atih thu a sawi. Indian Institute of Technology (IIT) leh Indian Institutes of Management (IIM) atangin mithiam tamtak Singapore-ah hnathawk an neih a ti a. IIT leh IIM atanga zirchhuakte chu an hlawkpui takzet tih sawiin Singapore ah an rawn luh belh zel a beisei thu a sawi bawh a ni.

PM Lee-a hian tun thla ni 15 hian Prime Minister hna a chawlhsan dawn a ni.

(Newsonair)

<><><>

#### AFGHANISTAN

Afghanistan-a tuilian avangin mi 200 chaung an thi tawh. United Nations chuan tunhnaia ruahpui sur avangin Afghanistan-ah hian tui a lian nasa a. Niminah ringawt khan hmarlam province Baghlan-ah mi 62 an thi a. Chenna in tam tak tuilian hian a ti chhe bawh a. Ruahsur hi ala tam avangin mitthi zat leh chhiatna thleng hi a la pun zel rin a ni a. Emergency lama thawktuten chhanchhuah hna ngawrh takin an kalpui a. Sipai leh police ten theihtawpin an pui bawh a ni.

(Newsonair)

<><><>